

Sier Zuan Moro, fo sopracomito, *quondam* sier Damian.

Sier Giacomo Marzelo, fo sopracomito, *quondam* sier Zuane.

Sier Pexaro da cha' da Pexaro, fo sopracomito, *quondam* sier Francesco.

Sier Agustin da Mula, *quondam* sier Polo, fo provedador di comun.

Sier Christofal da Canal, fo capitano di la cittadella di Verona, *quondam* sier Lucha.

Sier Zorzi Simitecolo, fo sopracomito, *quondam* sier Zuane.

134 *Copia di nove scrite per el consolo de Syo.*

Laus Deo.

1507, a dì 27 settembre in Syo.

Da nuovo, per uno merchadante armeno nostro cognoscente, partito di Angori a di primo di l'istante, et da uno merchadante zenovese, partito da la Porta dil Zelabi, fio dil signor, sta in Magnasia, a di 22 ditto, se à 'budo, come el signor Sophi, con lo suo exercito, era intrato nel paese de questo signor turcho do zornate, et acampatose a presso una terra grossa de ditto signor turcho, chiamata Chaisagna, con homeni 80 milia e più, in fra i qualli sono cavali 15 milia, tutti armati in arme bianche, contra di questi turchi, lontan di Angori zornate 5. El sanzacho di la qual terra è andato a l'incontro de ditto signor Sophi con presenti, et honoratolo. El qual ditto signor Sophi disse a lui, non esser venuto per far danno al paese del suo signor in Nadolo; et à fato andar le cride per tutto el suo exercito, che nisuno non fazi danno nel paese del signor turcho, ma vole che li sia provisto di vituarie per lo suo exercito, per i soi danari; et cussi si fazia. Li exerciti dil signor turco sono tutti in le circostantie di Angori, e stanno a la veduta: dove s' atruova Achaia, bassà di la Porta dil signor turco, con janizari 6000, asapi 8000, albanesi 5000; lo bilarbei di la Natalia con tuti li sanzachi 18, e timarati di la Natalia con le sue zente; de li qualli beliarbei, sanzachi e timarati è capitano lo fiol dil signor turco, sta in Magnasia, ma sopra tutti lo ditto bassà. Et non fanno movesta alcuna, *imo* stano a la veduta. Et adesso à passato in la Natolia lo bilarbei di la Grecia con le sue zente, et tutavia vanno a quella volta zente assai. Queste nove mi à rasonato lo ditto arminio, le quale me à confirmate con el zenoeze; el qual dize haver

inteso a la Porta del Zelabin, dove ogni di chapitano valachi. El qual Zelebin, atrovandose de li el zenovese, à visto venir uno valacho, mandato per el padre, con comandamento che 'l debia mandar i janizari 300 de li sui al campo. Per conclusioni, in tutta la Natalia non si parla altro, salvo dil Sophi. Al qual sono andati quanti dravis se trovano in la Natalia, et ogni di vanno, et altra zente de diverse sorte; si che in tutta la Grecia e Natalia non è più dravis, e quanti ne à potuto haver lo signor turco, li à fato tutti morir. Ditto signor Sophi pretende andar a debelar ditto signor Anadulli, suo inimicho, el qual li aveva promesso a dar una sua fia per mojer; e, acetato li pati, ge à mandata una fia di uno poveromo; per la qual cossa è sdegnato ditto signor Sophi, e à deliberato meter a fin el signor Anadulli. Et va per la via del signor turco, per esser le altre vie con montagne aspre e molto difizile, e passeria ditto signor Sophi. Et à consuetudine, quando va da lui alquano poveromo a inchinarsse, fa comandamento in tutto el suo exercito, che cadauno ge daga uno aspro, e si lo fa richo; e dize: L'è pechato, che questo poveromo non habia da viver. lo aspeto, *Deo dante*, infina zorni 15 in 20 Antonio mio fio, se atrova in Angori, dal qual ho abuto letere di primo di l'istante, e con lui se averà el seguito.

A dì 5 octubrio. In questa borra sono zonti qui schiavi 7, schanpati da Constantinopoli sabado di notte, che fo a di 2 de l'istante, con una barcheta di quelle passano di Pera in Constantinopoli. Li qualli me hanno ditto, come el signor turco à mandato nuovamente bombarde 300, con le charete, a la volta dil suo exercito; et che in Constantinopoli non si ardisse di parlar di le cosse dil Sophi; et che in Constantinopoli sono stati conduti do de li homeni del Sophi, presi da le antiguarde, e che tutta la terra li andavano a veder per miracolo; e che 'l signor turco stava con pensamiento.

A dì 12 dito. Poi scrita, a di 8 ditto, sono venuti do merchadanti di questo luogo da Paleoastro, a presso le Fogie una zornata, parti a di 6 ditto. Li qualli me hanno ditto, chome in ditto luogo di Paleoastro erano ritornati di campo in X in 12 di li ditti timarati, feriti; non che li schanpano, ma si sono trovati a combattere. E par lo capitano habbi mandato una parte di li ditti timarati, per antiguarda, contra questo signor Sophi; e sono stati a le man, e morti di una parte e di l'altra, ma questi turchi hanno abuto el pezo. Aspetamo de li el sequito.